

COMUNICATO n. 2186 del 09/08/2025

Manà fora su Trentino Tv l program l vegn endrezà dal Comun General de Fascia

“Pedies”: per en sabeda ai 9 de aost vegn fora la puntata #498 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 498. I argomenc de chesta setemèna. I Turchi a Moena, na conferenza portèda dant te Palaz de la Magnifica Comunità de Fiem da Fabio Chiocchetti del Goti olache se à rejonà del cianton de Turchia de Moena, de chest toponim foradeanter che encuriosesc e che à fat nascer stories e lezendes, defat de oril de chest an l é vegnù fora ence la miniserie turco-unghereisa “Il Turco”.

Brundibár: l spetacol portà sun paladina del teater de Navalge da la scola interregionèla per l teater e l cianter Le Muse e le Dolomiti. Chesta opera lirica con bec e tosec l é na contia n muie da sentiment, che porta dant ence n argument fort. L é stat na ocajon de comemorazion a 80 egn da la fin de la 2a vèra mondièla.

Michil Costa a Moena per rejonèr de turism, de la Dolomites, del trafich, de overtourism e de la comunanza ladina. Na conferenza enteressanta per endrez de “Moena-Incontri” olache l autor del liber FuTurismo l à portà dant ai prejenc sia idees en cont di limic, di problemes e de la prospetives de la comunanza ladina de la Dolomites che anchecondi la vegn condizionèda da n’economia turistica zenza confins, che la risia de straoujer sia ejistenza e so ambient.

Per la rubrica “Piates: Chel liber sun scancia” Maria Piccolin, che la è stata responsabola per n muie de egn de la biblioteca de Moena, la ne porta dant l liber “Addio Tirolo Addio” de Giorgio Bassi, che reiona de coche la jent de Vattaro l’ à cognù se n jir profuga en Moravia endèna la Gran Vera.

I reports de chesta setemèna, enjigné da Riccardo Zanoner e Angela Pederiva i vegn porté dant co la ousc de Angela Pederiva.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su Trentino Tv – canal 10 Prov. de TN- vigni sabeda da les 18.00 (sie da sera), de domenia da les 13.30 (mesa la does domesdi) e de lunesca da les 11.30 (mesa les doudesc).

L program ades l va fora ence sun AltoAdige TV – canal 11 de BZ - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevizionLadina>

Traduzion di Servijes Linguistics e Culturèi del Comun general de Fascia

(cdt)